


Seminarij Antuerpiensis
PARENTALIA
 IN FVNERE
 REVERENDISSIMI DOMINI
IOANNIS MIRÆI
 ANTVERPIENSIVM
 EPISCOPI

SVIQVE INSTITVTORIS;
 Perorante LAVRENTIO BEYERLINCK
 eiusdem Seminarij Præside,
 VII. Kal. April. M. DC. XI.



ANTVERPIÆ,
 EX OFFICINA PLANTINIANA,
 Apud Viduam & Filios Io. Moreti.
 M. DC. XI.

Seminarij Antuerpiensis

PARENTALIA

IN FVNERE

REVERENDISSIMI DOMINI

IOANNIS MIRÆI

ANTVERPIENSIVM

EPISCOPI

SVIQVE INSTITVTORIS.



I vel apud eos dicerem,
vel eo loco dicerem, vbi
& quibus IOANNIS MIRÆI
erepti heu! pridem
nobis Antistitis virtus, prudentia, eru-
ditioque cognita non sunt, Reuerendi
atque Clariss. viri, supersederem hîc
deiis verba apud vos facere. vererer
enim ne dicendi copia sermonis ino-
pem redderet, & alta sectantem cōfu-
sarum vbertas ad ima deprimeret.

A 2 adco-

adeoque magis idoneus laudator virtutum eius desideraretur, qui iam totum pæne orbem in meritam sui laudationem deuinxit. Ceterum cum apud eos dicturus sum, quibus optimi Præfulis admiranda indoles perspecta iamdudum fuit; eo etiam loco, cuius fundamenta, parietes, & tecta cum tacito quodam sensu amissum inclamant; tanto licentiùs liberiusque in eius laudes exspatiabor, quanto faciliùs indulgendum spondent vestrum omnium oculi, & quos præfertis animorum indices vultus, si non omnes pro dignitate enumerauero. Fatiger enim si vel loca singula perambulem, quæ IOANNES MIRÆVS eruditionis suæ ingeniique miro splendore illustravit. Equidem ad insitas nuper à Catholico Rege in Flandriæ Comitatu Athenas abeuntem, in quibus non prima tantum litterarum lineamenta, sed sublimioris etiam sapientiæ fontes hauserat, tenet Principum virorum domi-

domicilium Bruxella, solum eius natale, in quo non vno honoris gradu præfulsit. hanc subeuntem reuocat & reducit vrbium domina Antuerpia nostra, quæ cum patrem, patronum, & tutorem aliquando habuisse gaudet, amisisse lamentatur. O sortis humanæ dira ludibria! ô fallax vitæ bonum! ô vitream rerum nostrarum fidem! Ecce in quem vnum fiduciam constitueramus, cui nuper se Antuerpia obuiam effuderat, derepentè nunc exanimem, & inexpectatû importuni luctus argumentum cernimus. Heu consiliorum mutabilitatem! Sed quid? ita natura comparatum, Auditores ornatissimi, vt dolor & voluptas inuicem cedant, & ad Volupiæ aram nisi per Angoriæ adyta transitus non datur. Restabat igitur rebus tuis infelix Duacum, vt eruditionis tuæ germen, cuius accretione Palladios sacrosque tuos succos quos effuso alueo exteris impartis, transfundebas, priusquam

ebrios sulcos obumbraret messis, necdum adultum, & velut in herba euelleretur. Deerat tibi Bruxella, vt cum Ciuem, Pastorem amitteres, cuius auctoritate fulta, genij ingeniiq̃ue dotibus celebrata, cunctas super vrbes gloriosum verticem tollebas,

Quantum lenta solent inter viburna cupressi.

Supererat ad confertissimas huius sæculi calamitates Antuerpiæ nostræ, vt hoc duce atque auspice militiæ suæ destitueretur, eoq̃ue orbaretur Præfule, quo vno se recreabat; in quem intuens, de quo cogitans, omnium quas his errorum procellis exceperat acerbis memoriam deponebat, & velut ad Sacram anchoram confugiens, respiraturam se post tot mala tandem aliquando confidebat. Haud immeritò itaque omnium oculi lacrymis maduere, nec sine causa Brabantia solum in hoc funere lugubribus questibus personuit, quando cælum
ipsum,

ipsum, effuso imbrium diluuiο, dolo-
rem etiam testatū est. neque quī-
quam fuerit tam tenaci in aduersis
proposito, qui lacrymas in communi
hoc Ecclesiæ vulnere cohiberet, vt
quas nobilissimæ vrbis iactura, & bo-
norum omnium viduata prosperitas
pleno torrente eliceret. At mortalibus
vniuersis ab rerum natura & Principe
accipiendi spiritus, & reddendi co-
dem momento temporis legem dici,
Christiani nouimus: atque vt mori
neminem solere qui non vixerit, sic
neq; viuere quempiam posse qui non
sit moriturus. Cuius quidem memo-
res, positis querelis omnibus, lacry-
misq; nil proficientibus extersis, præ-
sentissimū leuamen præsentī mœro-
ri superesse video, pulcherrimam sci-
licet virtutum, quarum sola possessio
post rogum perennat, quibus excul-
tus ille fuit, recordationem. Quas
dum hoc loco singillatim tumultua-
riæ narrationis filo contexere aggre-

dior, ignoscite si non omnia ad exactam Rhetoricæ artis trutinam reuocata, aut ad seueri censoris vel Aristarchi alicuius examen discussa,

— *vt per laue seueros*

Effundat iunctura ungues,

videantur. Facit confusum & vix rationis compotem cum admirabilis omnium in hoc funere luctus, tum nobilissimæ huius coronæ expectatio, & desiderium audiendi excellentissimas eius laudes: quæ sanè tantæ sunt, vt omnem etiam exercitatissimo dicendi facultatem adimerent. vnde non parum reformido censuram seueræ illius virgulæ Fautorini Philosophi, sentientis turpius esse frigide laudari, quàm grauitè vituperari. vnum tamen me solatur, quòd suis meritis laudatior sit IOANNES MIRAEVS, quàm vt in ea commendatione vel minimùm indigeat. Quapropter magis pium censebitur officium quod extremum hîc exsoluimus, vt quem
vitæ

vitæ munere fruentem omni cultus genere profecuti sumus, eundem suæ laudis commemoratione, postquam esse inter homines desiit, decoremus. *Laudemus*, ait Ecclesiasticus, *viros gloriosos & parentes nostros in generatione sua*. Et facimus profectò quod debemus: & nescio, an posthac magis grato, magis commodo, magis expectato Antistiti similem vinqum operam simus præstituri.

Etenim is fuit IOANNES MIRÆVS, ea indole, eruditione, ingenio, rerum agendarum promptitudine, vt nec qui acutùm cernunt in hominum vitiis, inuenirent quod carperent, nec deesset aliis quod æmularentur. Fuit is inquam, quem nascentem Virtus excepit, natum bonæ Musæ excoluerunt, excultum Modestia, morumque integritas supra æquales extulit, Pietas ad Præsulatus culmen iam emeritum euexit. Multa studio à me omittenda video: quis enim aut finis,

A 5 aut

aut modus, si vastissimum hoc æquor oberrauero? Dicam igitur, quando ita res tulit ut supremo hoc pietatis obsequio Parenti ac Tutori suo *Seminarium* parentaret, pauca è plurimis. Vos verò Auditores ornatissimi, quibus cum in augustissimo hoc Christiani orbis theatro, vrbe hac, conuersatus integrum propè septennium fuit, assensu & cogitatione prosequimini, quæ ego velut rerum capita narratione attingam.

Atque ut à genere, quo nomine parentes & patriam nuncupamus, exordiar; fuit in M I R A E O tale, quale vel in alio quouis optaueris. quibus enim gloriæ cumuletur honoribus Bruxella quæ hunc ciuem produxit, nihil attinet hoc loco dicere. M I R A E O R V M quoq. stirps antiqua, ac honesta etiam nunc inter alias illius vrbis; ut ex qua, ceu ex vna arbore plures surculi, præclarissimæ aliquot soboles propagatæ. à quarum disciplina non degenerauit.

IOAN-

IN FVNERE EPISCOPI. II

IOANNES MIRAEVS; sed maiorum virtutibus excitatus id effecit, vt religionis & integritatis patrimonium sibi ab iis velut per manus traditum non tueretur tantum imitando, sed & augeret. ac gloriari meritò posset cum Latinæ eloquentiæ parente, quòd maioribus suis propriæ virtutis radio præluxisset. Non igitur insignis illa MIRAEI gloria tantum à generis splendore, non à patria, quæ velut mutuò ab aliis accepta bona sunt, cum

Et genus, & proavos, & quæ non fecimus ipsi

Vix ea nostra putet

prisci sæculi Poëta: non ab opibus, quæ fortunæ ludus: sed indulgentioris naturæ muneribus & excellenti indole propagata, micat inter alios

—— *velut inter ignes*

Luna minores.

Pulcherrimum aiebat ille, ita abundare, vt nemini quidquam debeas; ita illustrare alios, vt nihil ipse luminis
ab

ab iis mutuatus videaris. Gaude hoc ramo M I R A E A stirps, exosculare & venerare eum stipitem parens Bru-xella, qui hunc ciuem produxit; cuius amplissimas virtutes nulla tam surda posteritas, nulla tam ingrata fama non emeritis in cælum encomiis feret.

Natus est autem IO. M I R A E V S anno post redemptum orbem sexagesimo supra millesimum & quingentesimum: quando, vt in herbescente segete certa spes messis affulget, ex vagientis ore vultuque, quem animi ianuam censuit Cicero, puerili, insitæ virtutis imago elucebat; sic vt iam eum fore coniectarent, qualis postea fuit, crescentemque radium velut prima ætatis aurora erumpentem obseruarent. Stabat namque, vt ad Pisonem Lucanus,

— *ingenita virtutis in illo*

Pulcher bonos, & digna suis natalibus ora.

Dixisset ei profectò quod Themistocli

cli suo olim magnus ille Sophus: *Nihil mediocre futurus es ô puer!* & certè ita se res habet. generosa indoles, si accedit recta institutio, magnum bonum est Reipublicæ. Quocircà parentes conceptum tenello pectore ignem fouentes, filiolum cultioribus disciplinarum studiis imbuendum supponunt Patribus Hieronymianis, sub quorum pollice ea ætate informis ducebatur iuuentus, primosq. humanitatis riuos libabat. hic præcoci ingenio, & quæ ante pilos ei venerat abditarum rerum indagine facilè coætaneos præcellebat; vt exiguo annorum curriculo, pertinaci studio, vtriusque linguæ optimis scriptoribus euolutis, tantas eruditionis opes cumularer, vt iam à stupenda memoria haberetur clarus, & antiquæ dignitatis poëmata decantaret. Exhinc ad Philosophica castra animum adpulit, & Louaniû veras orbis delicias missus, sub Castrensis Gymnasij signis Peripateticorum principi sacra-

sacramentum dixit. verum tironem adhuc, primaque seuerioris Diuæ rudimenta pertractantem, exortæ recens in Belgio factiones, quæ vel tunc calebant maximè, profligatis ad Gemblacum *Ioannis Austriaci* fortissimi Herois & virtute & fortuna rebellibus, Louanio Duacû eiecerunt: vbi emenso quod bonis auibus auspicatus fuerat Sapientiæ stadio, Magistri artium titulo in Regia eruditionis palæstra insignitus fuit: quem non vt plerique hac temporum malignitate nudum & inermem, sed solido doctrinæ tegmine communitum tulit, vt vno dumtaxat certaminis loco superaretur. Quid nunc referam candorem animi, quid in iuvene morum senectutem? quid animi moderationem in voluptatibus, quid in cupediis temperantiam? quid maturitatem consilij in rebus grauissimis? Confluebant ad eum ceu vnicum delictum & virtutum theatrum studentium turmæ; ille-

illectę suavi concentu omnium actio-
num eius, qui cum eo & ab infantia
creuerat, & ab vtero matris fuerat
egressus. Non cum blandimenta, quę
feruidę illi ætati natura dedit, tenuer-
unt; nec lubricas adolescentiæ vias
ingressus aliquando, vtpote cuius li-
bertatem sanctissimo vitę instituto
moderabatur.

Neque illi, vt huius sæculi horiper-
dis vsu plerumque venit, quibus volu-
pe spontaneam eius rei iacturam facere,
quod sapientissimum quemq; ma-
ximo semper in pretio habuisse cõstat;

— *quid dexter senio ferret*

*Scire erat in voto, aut damnosa cani-
cula quantum*

Raderet.

Sed libros & calamum efficacia do-
ctrinę instrumenta, tamquam tene-
brofi otij solatia adhibebat; & venerā-
dam Virtutis imaginem, quam tenuis-
se nouerat veteres illos humanę Sa-
pientiæ Præsides, induere assiduo stu-
dio

dio contendebat. Hinc à Themistocle diligentiam, à Frontone grauitatem, à Socrate continentiam, temperantiam à Fabricio, à Scipione pudicitiam, à Catone deniq; beneficentiam erga omnes mutuabat. Siquidem illi

— *quæ Samios deduxit littera ramos
Surgentem dextro monstrarat limite
callem.*

Sed nec ignorabat excellentis animi adolescens, vt agrum ita & animum sine cultura fertilem esse non posse, ac promptissimam ad scientiæ culmen viam esse alios erudire, & *neminem multa posse scire* (vt eleganter Latini sermonis restitutor cultorq; Erasmus) *nisi qui multa consuevit docere.* eumque demum felicem, cui & accipere lucem prosperè, & reddere placidè contingit. quare non paucos annos in humanitatis professione cōsumpsit, alijs tradere ingressus quod suomet sibi labore pepererat. Mirabatur docentem externa iuuentus, cū abstrusæ doctrinæ

Etrinæ opes venusto oris gestu pande-
 ret, & ab aliis intacta sectaretur inter-
 pretando. adeò vt cunctos ceu Bel-
 gicus quidam Hercules, doctissimis
 eloquij vinculis detineret, & ad se vel-
 ut olim Thebana mœnia Amphion,
 aut bruta animantia Threïcius, allice-
 ret. Quin; quòd Historiam tempo-
 rum lucem, veritatis nuntiam, vitæ
 magistram sciret; & nihil vtilius iu-
 cundiusque cogitaret, quàm in huma-
 næ vitæ theatro, quod Historia par-
 tibus omnibus mirè instructum ha-
 bet, sedentem periculis aliorum, sine
 suo periculo cautum sapientemque
 fieri; omnes in eius studium animi
 nervos intendit. quò factum vt de re
 quavis differetem, nulla ymquam ar-
 cana fefellerint. Et hic rerum est ordo
 & consensus, Auditores, vt qui mar-
 cescibilem iuventutis florem litterarię
 militiæ consecrant, numquam aut la-
 bore frangantur, aut cupediarum ille-
 cebris irretiantur. Hinc veteres illi

B Apo-

Apologorum figuli Poëtæ, cùm deos omnes Veneris subiiciant imperio, in Mineruam & Musas haud quidquam iuris effrenato Cupidini esse voluerūt. Sed video, quò magis progredior, cò magis in altum me inuehi, & à proposito tramite in latissimum pelagus deduci. sistendus igitur cursus, & in Miræanum portum dirigenda hæc rates. vos quæso nihil remittite de aura vestræ benignitatis.

Inierat iam eam ætatem IOANNES MIRÆVS, quæ reliquæ vitæ institutum ponderare solet:

*Cumque iter ambiguum est, & vitæ
nescius error*

*Diducit trepidas ramosa in compita
mentes,*

& suspensus animo hæret quod tandem vitæ iter ingrederetur, occulto diuinæ motionis sensu, ad Ecclesiasticæ vineæ, quam potens ille & æternus Paterfamilias plantauit ab initio, culturam, se non inuitari tantum, sed & rapi

rapi percepit. paruit inuitanti, paruit
 rapienti: & in odorem vnguentorum
 eius, cuius nomen oleum effusum, cu-
 currit, ac tot præclarissimis scientia-
 rum artibus instructus, Sacræ paginæ
 adyta summa contentione iniuit, mi-
 litia huius Ducibus, *Matthia Bossenio*,
Thoma Stapletono, *Bartholomæo Lintren-*
fi, & *Guilielmo Estio*, summis Theo-
 logicæ facultatis luminibus: quorum
 notas fidei calamo excepit, tantaque
 pertinacia memorię impressit, vt nunc
 etiam obrutus mole negotiorum quæ
 cum Episcopali munere susceperat, ea
 examussim depromeret rerum om-
 nium argumenta, quæ ante longa an-
 norum spatia apud magnos illos æter-
 næ sapientiæ Antistites vbertim cu-
 mularat. Deus bone! quàm multa vni
 viro supra communem naturæ in aliis
 ordinem contigerunt? vix enim Theo-
 logicis fontibus labia proluerat, quin
 oppidò quæuis arcana erueret, & ad ea
 penetraret vbi terminum humano in-

genio esse voluit rerum auctor Deus. Ceterum postquam publicè disceptando eruditionis comparatæ paucorum annorū curriculo monumenta in admirantium animis publicasset, eiusdem facultatis lauream est cōsecutus. Quando memoria repetens Apostolorum Principi à Domino dictum, *Si amas me, pascere oves meas*; posthabitis amplioribus titulis, quibus eum vltro decorandum censebant religiosissimi Belgicæ Præsules, & abdicato Canonico sacerdotio quod in Namurcensi opido consecutus fuerat, Bruxellam, ciuium suorum, quos noui errorum labyrinthi irretiebant, sortem miseratus contendit. & vt erat minimè ambitiosus, ac nitidæ iucundæque vitæ ad bonam frugem percupidus, Pastorale munus in D. Iacobi suscepit, & cum eo tot hominum curas sarcinasque in se vnum transtulit. Videmus nunc omnes passim inertia, sectari otia, & ne ad nummularios com-

commiffa fibi talenta deferant, eadem intra ipfa terræ viscera velut in loco Manium condere, & è tempeftate in tranquillitatis portum properare. Ceterùm alia, longè alia mens MIRAEONOSTRO: qui inftar lucernæ fuprà candelabrum pofitæ luxit omnibus quĩ in concredita fibi domo erant, & vaftatricum curarum pondus vltro fuf-tinens, è quietis portu in periculofiffimas fe tempeftates coniecit; & acceptis ab homine illo qui peregrè proficifcens feruis facultates difpenfaue-rat quinque talentis, alia in fuper quin-que fuperlucratus fuit.

Dies, & vox me deficeret, Auditores, fi vel prima capita enumerauero eorum, quæ in Paftorali officio, quod annos plures fuma cum laude obi-uit, exantlauit. quàm folerter Domi-nici gregis incolumitati incubuerit, quæ Nouatorum monftra vibranti linguæ fulmine perdomuerit, proft-rauerit, contriuerit. quot fufceperit affli-

Etos, quot pusillanimes crexerit, quoties à recto rationis tramite deuios ad saniora consilia reuocarit. Iure de eo dixerim quod de semetipso confitetur beatus ille senex magnus inter omnes Orientales, *Oculus fuit ceco & pes claudo*. Verùm enim uerò vt clarum mane angustas rimas suo splendore extendit, ita Miræani nominis fulgor non ad vulgares dumtaxat, sed & intra laqueata Principum virorum, in quorum intimam familiaritatem adscitus dudum fuerat, tecta suæ lucis radios emisit. Nam postquam eum Canonica dignitate exornassent qui suffragij ius ad D. Gudulę collegium, quod eadem in vrbe augustissimum existit, sibi vendicant; spectatæ illius virtuti affulsit præter alios Illustrissimus *Matthias Houius*, Mechliniensium Archiepiscopus, & Belgicæ Primas, censor ingeniorum longè grauissimus: qui ampliorẽ Olympum tanti Atlantis humeris imponendum ratus,

tus, in eo omnem cogitationem reposuit, qua tandem ratione augustioris nauigij clauo, longo rerum vfu valens nauclerus applicaretur. Accidit peropportunè vt *Guilhelmus* ex Baronibus de *Grimbergen*, vrbis nostræ, quam vrbium ocellum appellauit magnus Lipsius, Antistes, vitæ merito ad Cameracensiū principem Cathedram euocaretur. quærebatur viduę Pastor, qui collapsa ea temporum nocte erigeret, concussa restauraret, ac ingruentem luporum rabiem efficaci latratu cohiberet. dormientibus enim hominibus & ferrum in se mutuò acuentibus, inimicus zizania in medio tritici disseminarat. quibus euellendis non quæuis indoles par visa Illustrissimo Archipræfuli, & qui illi hac in re ausculta-
 bant, Serenissimis Principibus nostris: quorum ea mens, quam olim vguisse in Pio II. Pontifice memoriæ proditum, non *Magistratus viris, sed viros Magistratibus dandos esse.*

Igitur dum fluctuant, animoq; pen-
 dent omnes in quem tandem *Grim-*
bergij dignitas esset transitura, (maior
 ut dixi, moles erat quàm ut à quouis
 exciperetur,) ecce IOANNI MIRAE^o,
 nec rogati, nec pensanti ea inculcatur.
 Quid hîc faceret vigilantissimus Pa-
 stor? ultro oblatae dignitati repudium
 dare, vetabat hinc Sereniss. Princi-
 pum, quorum punctum ad eam tulerat,
 auctoritas; illinc non Mechlinien-
 sis tantum iussa, sed & Vaticani Præ-
 fulis imperia. amplecti oneris graui-
 tas & muneris amplitudo deterrebat.
 Quo enim mare altius, & venti vio-
 lentiores, & tempestas seuior. nec sine
 ratione asseruit Pœnorum Imperator
 iam iam moriturus, *Finis ad alta leua-*
tis est ruere. O vertigo morum opti-
 ma! ad quod plerique præcipiti ferun-
 tur ambitione, & indignis viro artibus
 deueniunt, reicitur ab his, qui pri-
 mam illam, siue nascentis, siue recens
 natae Ecclesiae pietatem assequi con-
 ten-

tendunt. Inter quos raro exemplo accensendus est MIRAEVS: vtpote cuius animum Dominici ouilis sollicitudo, non peruicax titulorum laudisque cupiditas exedebat. vnde non verborum blandimentis potentium aures demulfit, non largitione obsequiove oculos purpuratorum perstrinxit; sed nobilioris doctrinae cultu, & propè adamantina ingenij vi, ad supremum hoc sacrae mytræ fastigiū, in nobilissima Vrbe sibi viam praeiunxit. Vbi nunc

— *auaritiæ fœdissima nutrix*

Ambitio, quæ vestibulis, faribusque regentum

Excubat?

vbi infana gloriae fames, quæ Menercratem & Macedonum Regem incessit, vt aris positis sibi incensum adoleri, & ter maximi Iouis encomio salutariperitauerint? vbi profusissimæ largitionis pestis, qua magnum illum Cæsarem summi Pontificatus honorem emisse potius, quàm suo merito

peperisse, memorât Annales? vbi mendaciorum impudens acies, quæ Lucium Equitium Firmanum amplissima tribunatus potestate vallauit? & vt innumeros præteream, vbi illa effrenatæ mentis calamitas, quâ

—— *deus immortalis haberi*

Dum cupit Empedocles, ardentem frigidus Ætnam

Insiliit. ———

MIRAEVS non his artibus Ecclesiæ nostræ Præsulatum obtinuit. vt qui ad hunc publici honoris gradum, licet optimo vitæ instituto præcinctus, non sine graui animi dolore pertractus fuerit. quibus enim precibus, quibus gemitibus, quibus lacrymis amplissimum illud munus à se auertere elaborarit, etiamsi tacuerimus nos, docet & clamat biennale mentis dubiæ decretum, quod adhibuit priusquam manus daret. Considerabat enim diu multumq; eminentem illam vitæ sanctitatem, quam exigit summum illud
munus:

munus : eamque Pastorum Principis censuram extimescebat, quâ cōminatus fuit grauius iudicium illis, qui primas indignè cathedras occupassent.

Iam ad ceteras eius laudes abeunti, quantus dicendi campus aperitur? crescet mihi opus Iliade maius, Auditores, si eas in medium adduxero. Cathedræ honorem consecutus sacrisque infulis insignitus, pristinum humilitatis decus, & animarum sibi creditarum sollicitudinem numquam deposuit. nihilque illi ea dignitas nouum adtulit, nisi vt cū prodesset quidem plurimis, sibi magis metueret, ne non satis personæ dignitatem tueretur, & appensus in statera rigidi illius exactoris, inueniretur minus habens. Et hæc ille quidem animo volebat. dum eius aduētū recreata Antuerpia, in gratulationis voces erumpebat, quòd eum Pastorem & Episcopum animarum nacta esset, qui grauitatem Episcopalem ore blandissimo con-

condîret, superstites quamuis debiles errorum fibras extirparet, cuius famam domi forisq̃ue nitida ac hospitalis disciplina, & liberalis animi beneficentia tuebatur. Quis nunc vel cogitatione complecti, vel sermone persequi valeat, quę quantãve sæculorum laude, & æuiternâ Annalium memoriâ digna præstiterit? quoties labantem Ecclesiam sustinuerit? quàm improbos labores noctu diuq̃ue pertulerit, vt extra Catholicorum septa positos, ad suæ matris gremium, in quo mori feliciùs asseruit magnus Poloniæ Cancellarius, quàm ab initio non nasci, reduceret. Omitto eius in rebus opportunè gerendis prudentiam: prætereo moderationem in priuatis, in publicis splẽdorem: non refero quam in omnibus cęlestis præsidij fiduciam adhibuerit: assiduam insuper verbum Dei annuntiandi consuetudinem & diligentiam non commemorabo. De *Seminario* etiam isto, quod sub Præsulatus

latus exordium noua quadam insitione, ab aliis huius vrbs Episcopis terræ mandari cœptū, plantauit, nihil etiam hoc loco dicam. Ipsi scitis, Viri Ornatissimi, quantum ex eo emolumenti in Diccēsim nostram, forensium Ecclesiarum Rectoribus qui paruulis panem flagitantibus frangerent pridem destitutam, emanarit hætenus. & quæ adhuc spes grauidi mox Aurumni, in virescente nouarum stirpium, quas præsentēs conspicamini, segete affulgeat, taciti vobiscum considerate. Hoc dicam, eo quæ vno contentus ero, tanto eum diuinæ gloriæ zelo æstuassee, vt nihil vniquam esset tam arduum, tantis periculis expositum, quod ei suaderet aliquando præterire ea, quæ pro Ecclesiæ dignitate, siue tuenda siue amplificanda, omnino agēda iudicasset. Reuocemus quæso nobis in memoriam sedatas nunc paululū ciuiliis belli procellas, quibus iactati fuimus. quas non templorum
rui-

ruinas, ædesque Diuorum collapsas,

Et fœda nigro simulachra fumo,

manantibus præ mœrore lacrymis intuebimur? nemo erat qui restaurandis iis quæ ceciderant incumberet, nemo qui Ecclesiarum lustrationi vtilissimæ vacaret, qui auitum pietatis decus repararet, nemo deniq. qui, vt cum Ezechiele loquar, infirma consolidaret, egrota sanaret, cōfracta alligaret, abiecta reduceret, & quæ perierat quæreretur.

Dispersi erant greges Domini eo quòd non esset pastor qui requireret, & facti in deuorationem omniū bestiarum agri. Bello- rum hic ludus erat, & iocus. Sed ecce requisit mox oues dissipatas vigilantissimus Pastor, & liberauit eas de omnibus locis in quibus fuerant dispersæ in die nubis & caliginis. pãuit gregem suum, & in brachio congregauit agnos, ac in sinu suo leuauit, fœtas ipse portauit. Equidẽ quæ terrere alios solent, MIRAEØ alacritatis calcar' subdidẽre. Quotus enim quisque debacchantem cuncta militum

tum licentiam non horreat? quis se temerè periculis offerat, & è portu in turbidum salum excurrat? Nihilominùs infracto animo vigilantissimus nauclerus, impetratis ab hoste tutelaribus, eorumque fide subnixus, vniuersam Dioccesim magna sedulitate oberrauit, sanctaque Domini contaminata denuò sacrauit: & quò hæreticæ illius hydræ, in suam & aliorum perniciem contumacis, renascentia capita refecaret faciliùs, *& edificaret muros Ierusalem, quia deserta erat, & portæ eius consumptæ igni*; Cleri Senatuum celeberrimum, exeunte superioris anni vere indixit, in quo pleraque summa prudentia sancita, quæ mox Serenissimorum etiam Archiducum calculo firmata fuerunt.

Etenim si gaudemus Rempublicam hanc, semota errorum nebula, morum Catholica honestate vesti? vestiuit eam MIRAEVS. Lætatur sacrarum cærimoniarum vsum Diuinis

nis officiis magna populi deuotione
adhiberi? adhibuit M I R A E V S. Lau-
damus Catholicos, in occultis tene-
bris & alieno à nobis solo delitescen-
tes, salutaribus myſteriis imbutos, &
difficultatibus erutos? imbuit, & eruit
M I R A E V S. Summa omnium eſt,
quòd Dioceſis; etiam qua parte ſub
diſparis Domini iugo ingemit, Eccle-
ſiam audiat; quòd tot nouellæ plantu-
læ educantur, tot eruditionis officinis
hæc Vrbs adornetur; iuuentus in vi-
tium ſecti nata, ſine pretio iis imbua-
tur diſciplinis, quarum poſſeſſio om-
nem vitæ acerbitatem lenit, & immo-
dicas adfectuum illecebras modera-
tur; quòd nouas Religioſorum colo-
nias hîc collocatas miremur; quòd
denique piorum hominum volunta-
ti, quam iuſta extremæ voluntatis ſen-
tentia adſeruerunt, fiat ſatis, dum ſa-
crarum foundationum pia obſequia è
tenebris velut ad vitam reuocantur;
vni M I R A E O nos omnes debere fa-
tea-

teamur, necesse est. Quapropter intuentibus magnitudinem rerum quas modico temporis spatio peregit, credere propemodum licet, tantum virum Superos Ecclesiæ nostræ necessitatibus accommodasse, quarum ægritudine superata citò eum repeterent suæ stirpi. Cuius rei argumentum est vitæ finis, qui & gloriæ ei pariter datus fuit. exspectauere namque eum facta in patrio solo, quò de rebus maximis consilia initurus concesserat, & in secundissimo fecunditatis cursu rapuere. Ita optima quæque in humanis perennare non permittuntur. O lamentabilem tanti Præfulis mortem! ô inæstimabilem Belgicæ nostræ iacturam! Supersunt tamen in mediis dolorum fluctibus argumenta quibus animum oblectemus, quorum pensitatione mens nostra excitetur. quòd nempe in mediis actionum tempestatibus, velut è clauo euocatus sit: quòd eo ipso die qui vltimus ei fuit in terris,

C imma-

immaculatam de mōre hostiam Deo obtulerit : quòd morientem piissimarum precū remigio comitati qui præsentes aderant viri religiosissimi; quos inter principem locum debeo *Matthia Houio* Mechliniensium Archipræsuli: quòd sacro delibutus oleo tamquam fortissimus Athleta, ea in vrbe spiritum redderet, vbi eum hauserat; eoq. loco coronam acciperet certaminis, in quo vel maximè eam promeruerat. Denique quòd paucis antè diebus quàm hinc emigraret, facultates alendæ publico bono iuuentuti, cùm in *Seminario* hoc à se instituto, tum in *Duaceno*, in quo studiorum metam olim contigerat, supremis testamenti tabulis, de quibus prouidè sibi cauerat, reliquerit. & certè insignis illa vita, quæ quasi fabula tam præstantes exhibuit scenas, nō debuit alio quàm præstantissimo etiam epologo terminari.

Peruenerat autem veneranda proceri ac venusti corporis maiestate, quā
Natu-

Natura ei admodum indulgenter e-
largita fuerat, ad annum primum &
quingagesimum, integra valetudi-
ne, quæque longioris vitæ certissi-
mam spem promittebat, nisi eam im-
prouisa, omnemque Medicorum in-
dustriam fallens, incoctæ pituitæ de-
fluxio præcidisset. adeò subtiles mor-
tis causas fata inueniunt, dum ex de-
creto supremi illius Imperatoris vr-
gent. Interim ad emeritos eius titulos
adiicere possumus, quod magno Tur-
riano adscriptum lego;

*Ante annos sciuisse nocet: nam maxima
virtus*

Persuasit morti, vt crederet esse senem.
Supereſt igitur, Viri Clarissimi, vt
Manibus erepti nobis Præſulis benè
adprecemur, eiusque ossa molliter cu-
bare, quod antiquitas fecisse perhibe-
tur, iubeamus, donec cum gloria no-
uissimè resument solutam positi cor-
poris compagem, & corruptibile hoc
induet incorruptionem, & mortale hoc im-

mortalitatem. Tu verò IOANNES MIRAE, qui ex hac difficultatum palæstra enauigasti tandem ad auctorem tuum, & auxisti (vt opinamur omnes) beatas illas mentes, quarum in lumine ambulare dum adhuc nobiscū ageres assiduè contēdisti, nauem hanc cuius clauum tanta sedulitate tenuisti, & *Seminarium* istud quod optimis institutis exornasti, opibus auxisti, pænè à fundamentis crexisti, Principi nauclero cominenda : nec cessa omnium nostrū curam gerere in cēlo positus, quos tantis beneficiorum muneribus cumulasti in terris. Nos certè quibus multa reliquisti quæ collaudemus, innumera quæ imitemur, quoad in hoc ergastulo detinebimur, oblectabimur gratissima memoria tui : & vt excellentissimi tui nominis amplitudo, inuidia aut edaci temporis lima conteratur, pro viribus numquam sinemus.

D I X I.

A P P R O B A T I O.

FVNEBREM hanc Orationem nomine Seminarij Antuerpiensis, Reuerendiſſimo in Chriſto Patri ac Domino IOANNI MIRAE O Antuerpienſium Præſuli (heu nimium properè, ſi queri fas eſt, Eccleſiæ erepto) à doctiſſimo D Laurentio Beyerlinck, S.T. Licent. Eccl. Cathed. Antuerpien. Canonico, & Seminarij eiſdem Præſide dictam, & à me pro officiũ ratione perlectam, digniſſimam luce & typis iudico. Antuerpiæ, IX. Kalend. Maij, M. D C. X I.

Franc. Haræus S. T. L. Librorum
& ſcriptionum Cenſor.



